




KOMUNIKADO PA PRENSA

FIN DI UN TEMPORADA DI ORKAN 2017 AKTIVO

Temporada di orkan 2017 a kuminsá bastante trempan pa Kòrsou, ora ku entre di 14 i 19 di yùni un disturbio aktivo ku a forma riba Afrika, a krusa Osean Atlántiko riba un ruta hopi mas sùit ku kustumber. For di riba 17 di yùni, Servisio Meteorológiko Kòrsou (MDC) a kuminsá hasi menshon di e disturbio aki, indikando ku tabata eksistí e posibilidat ku e por a bai afektá wer di Kòrsou un tres pa kuater dia despues. E sistema aki a aserká kosta di kontinente Suramerikano riba 18 di yùni i na e momentu ei pa promé biaha National Hurricane Center a hasi menshon di un Siklon Tropikal Potensial (*Dos*). Ounke e sistema aki no tabata un tormenta tropikal ainda, for di momentu ei a kuminsá emití vigilansia i atvertensia di tormenta tropikal pa algun isla den oriente di Área di Karibe. Tabata pronostiká tambe ku e sistema aki lo a bai pasa over di Kòrsou dos pa tres dia despues. Su manisé e disturbio a ser klasifiká ofisialmente komo Tormenta Tropikal **Bret** durante di atardi, na momentu ku e tabata aserkando parti nortost di Venezuela i Trinidad. Algun ora promé ku esei Meteò Kòrsou a emití un Vigilansia pa Tormenta Tropikal (*Tropical Storm Watch, Kódigo Oraño*). Den e boletin a indiká ku e sistema aki, pa motibu di kondishon di bientu fuerte na nivel haltu i tambe dor ku un parti di **Bret** lo pasa over di tera, lo debilitá e sistema, promé ku e yega den nos region. Esei a sosodé tambe durante di atardi di djamars 20 di yùni, ora ku **Bret** tabata situá na un distansia di algu ménos ku 200 kilometer ost di Kòrsou. **Bret** a debilitá den un ola tropikal fuerte durante di atardi i ora ku el'a yega e mesun anochi ei den nos region, el'a kousa algun momentu ku áwaseru (5 te 20 mm), kompañá pa bientu fuerte . A registrá velocidat di bientu di hasta 120 km/ora (forsa di orkan) riba Seru Kokori e anochi ei i e bientu ei a kousa daño na algun lugá, kaminda ku palu a kai i kibra waya di koriente.



Ruta di Bret, Don, Harvey, Irma, José i Maria

Un luna despues di **Bret** un siguiente disturbio tabata aserká Área di Karibe dia 17 di yùli. Ora ku e tabata na un distansia di algu mas ku 950 kilometer ost di Trinidad a klasifiká e sistema aki komo Tormenta Tropikal **Don**. Pronóstikonan tabata indiká ku e ruta premirá di **Don** tambe lo a trese e sistema aki alrededor di 50 km di Kòrsou despues di dos dia. Meskos ku **Bret** sin embargo, **Don** tambe lo a bai debilitá, promé ku e yega den nos region pa motibu di bientunan fuerte na nivel haltu. Un biaha mas, MDC a emití algun boletin di siklon tropikal di informashon (Kódigo Hel) pa notifiká otoridatnan i pueblo di e posibel impakto di e sistema aki. Ya ku e lo a debilitá promé ku e



MINISTERIO DI


TRÁFIKO, TRANSPORTE & PLANIFIKASHON URBANO

Servisio Meteorológiko

yega den nos region. Durante di anochi di 18 di yüli *Don* a debilitá den un ola tropikal i loke a sobra di e sistema aki no a trese kasi nada di awa ni bientu pa Kòrsou.

Na luna di ougùstùs, un otro tormenta tropikal suak a parse di bai forma un menasa pa Kòrsou. Dia 17 di ougùstùs e disturbio aki a ser klasifiká komo Siklon Tropikal Potensial *Ocho* i na e momentu ei e tabata situá na un distansia di 475 kilometer ost di Barbados. E trayekto pronostiká di dje tabata mas nort ku *Bret* i *Don*, pero tòg MDC tabatin hopi atenshon pa e sistema aki, ku e mesun atardi ei a ser klasifiká komo Tormenta Tropikal *Harvey*. Pa *Harvey* tambe MDC a emití algun boletin di siklon tropikal di informashon (Kódigo Hel), pa tene outoridatnan i pueblo na altura di último desaroyonan. E tormenta aki a sigui move den direkshon wèst i, manera a ser antisipá, riba djasabra 19 di ougùstùs, ora ku e tabata pasando ku su sentro na un distansia di algu mas ku 200 kilometer nort di Kòrsou, a debilitá promé den un depreshon tropikal i mas lat e anochi ei, den un ola tropikal. Awa a kai na algun parti di Kòrsou. Loke a sobra di *Harvey* a sigui move bai den direkshon di Golfo di Mexico i despues di tres dia *Harvey* a reorganisá den e region ei i hasta a intensifiká rápidamente i bira un orkan di kategoria kuater, ku a kousa hopi daño na estado Texas na Merka.

Sobrá tormentanan tropikal i orkan ku a forma den region Atlántiko no tabata un menasa dirèkt pa Kòrsou. Na momentu ku Orkan *Maria* dia 21 di sèptèmber tabata situá djis nort di Repùblika Dominikano, un área di mal tempu ku a forma e atardi ei riba parti nortwèst di Venezuela, a move den direkshon nort i a alkansá Kòrsou na kuminsamentu di anochi. Na algun parti di Bándariba a kai bastante áwaseru (mas ku 30 mm), pero tabata algun ráfaga di bientu ku a kousa daño material na algun kaminda. E bientu mas fuerte ku instrumèntnan di MDC a midi durante di e evento aki (riba Seru Midden-Seinpost) tabata 80 km/ora.



Riba e imágen di satelit aki por mira klaramente ku Sint Maarten tabata situá meimei di wowo di Orkan Irma.

Por mensioná tambe ku MDC a asistí Sint Maarten despues ku Orkan *Irma* riba 6 di sèptèmber a pasa riba i a kousa un desaster na Sint Maarten. Promé ku e orkan aki yega Islariba, Meteo Kòrsou a



informá Gobièrnu di Kòrsou di e impakto ku tabata anticipá ku partikularmente Sint Maarten lo a bai risibí di e orkan peligroso di kategoria sinku aki. Despues ku *Irma* a pasa, MDC a tuma akshon mas pronto posibel i a duna asistensia tékniko na Servisio Meteorológiko di Sint Maarten (MDS). Den e promé tres dianan despues ku Orkan *Irma* a pasa, MDC a yuda MDS tambe ku trahamentu di boletinnan spesial pa anunsiá outoridatnan i pueblo di Sint Maarten di e menasa di Orkan *José*.

Tambe MDC riba djadumingu 10 di sèptèmber tabatin e honor di risibí bishita di Su Mahestat Rei Willem-Alexander. Su Mahestat a bin risibí informashon via di direktor di MDC riba e impakto di Orkan *Irma* i tambe pa haña sa kon grandi e menasa di Orkan *José* tabata pa Sint Maarten, Sint Eustatius i Saba. A informá Rei Willem-Alexander entre otro kon orkannan ta forma, tokante di e relashon i koperashon ku tin via di OMM ku *National Hurricane Center* di Merka i di e miembresia di Kòrsou i St Maarten den OMM. Tambe a pone Rei Willem-Alexander na altura kon Meteo Kòrsou a informá pueblo di Kòrsou i na mes momento yuda Meteo St Maarten pa nan por a aktivá bèk.



Direktor di MDC, Dr. Albert Martis, dunando splikashon di situashon di wer na Rei Willem-Alexander, gobernador Lucille George-Wout i vários otro miembro den delegashon di Rei.

Algun dia despues MDC a manda tambe, ku yudansa di Marina Real di Hulanda, un stashon outomátiko pa Sint Maarten, pa asina por tabatin opservashonnan meteorológiko atrobe na Airopuerto Juliana. E stashon original tambe a ser destruí dor di impakto di *Irma*. Informashon di un stashon asina ta esensial pa avionnan por baha i lanta sin problema. Ya ku Kòrsou huntu ku Sint Maarten ta ser representá na OMM, direktor di MDC a bai Sint Maarten pa evaluá ki daño aparatonan di MDS a sufri. Di e manera ei, por a pidi asistensia finansiero di OMM pa por logra di remplasá e aparatonan ku a ser destruí dor di impakto di *Irma*. Den e kuadro aki tambe dia 27 di sèptèmber Hefe di Departamento Tékniko di MDC a biaha pa Sint Maarten pa yuda instalá un “weerstation” outomátiko nobo na e airopuerto i na mes momentu drecha esun ku tei kaba i ku a haña daño.